

Utangulizi

Kwenu nyote waana wa Familia ya Mungu, Jimboni Mbinga: **“Neema na iwe kwenu na amani itokayo kwa Mungu Baba yetu, na kwa Bwana Yesu Kristo” (Rum. 1:7).** Aidha kwa misiba iliyotufika, yaana vifo vya wazee wetu wapendwa, Mhashamu Askofu Mstaafu Paul-Werner Scheele na Mhsahamu Askofu Mstaafu Emmanuel Alex Mapunda, tufarijiane sisi kwa sisi kwa imani yetu **(rej. Rum.1:12)** katika Kristo Mfufuka na ufufuo wa wafu **(rej. 1Kor.15).** Tuendeleo kuwaombea ili Mungu, aliye mwema kila wakati, apate kuwatuza kwa mema mengi waliyotenda katika uhai wao.

1. Shukrani na Pongezi kwa Mshikamano

Katika fursa hii, pamoja na mambo mengine, awali ya yote tunapenda kuwashukuru na kuwapongeza wana-jimbo wote – maklero, watawa na waamini walei – kwa namna tulivyoungana kipekee wakati wa msiba ule

mkubwa uliotufika hapo Mei 16, 2019, yaani, kifo cha mzee wetu na muasisi wetu wa Jimbo, Mhashamu Baba Askofu Mstaafu Emmanuel Alex Mapunda. Pamoja na kushukuru na kuyaenzi mema mengi sana aliyotutendea sisi Familia ya Mungu ya Jimbo la Mbinga, tunaamini kabisa mshikamano ule ulikuwa sababu ya imani thabiti tuliyokuwa nayo katika Kristo Mfufuka na ufufuo wa wafu. Kwa msisitizo zaidi, tunasema katika roho ya Mt. Paulo kwamba, nje ya ukweli huo basi imani yetu ingekuwa haina maana **(rej. 1Kor.15:12-34)**. Tudumu katika mshikamano huo ukitawaliwa na imani hiyo sahihi.

Tunapowashukuru wanajimbo wote katika ujumla wake, na mmoja mmoja kipekee, kwa mshikamano na michango mbalimbali ya hali na mali katika kipindi hicho cha simanzi kubwa, tunapenda kuishukuru na kuipongeza sana Kamati ile maalum kwa umakini wake katika kuratibu na kusimamia shughuli zile za maziko ya mzee wetu.

Waombolezaji wote toka ndani na nje ya Jimbo, wamekiri kuwa matukio yote yaliyoendana na kumsindikiza mzee wetu kwenye makazi yake ya milele, yaliratibiwa na kusimimamiwa kwa umakini mkubwa sana. Na kwa sababu hiyo tunawashukuru na kuwapongeza sana wanakamati; na Mungu azidi kuwadumisha kuwa wakati wote wakarimu katika kutumia vipaji mlivyojaliwa kwa manufaa ya Familia ya Mungu popote muwapo.

2. Kuhitimisha Maombolezo

Kufuatia misiba ya **Wahashamu Maakofu Wastaafu Paul-Werner Scheele na Emmanuel Alex Mapunda**, na kwa kuzingatia kuwa sio wanajimbo wote walipata fursa ya kushiriki kikamilifu katika maombolezo na maziko ya wazee wetu hawa, kwa kushaurina na Maklero na Wajumbe wa Halmashauri ya Walei Jimbo, tumeazimia kijimbo tuhitimishe maombolezo yetu kwa namna iliyo rasmi.

Utaratibu wa kuhitimisha maombolezo hayo utakuwa kama ifuatavyo: ***kuanzia Juni 17, 2019, katika makanisa ya Parokia na Taasisi zote Jimboni ziazimishwe Misa za Novena za Marehemu hadi Juni 24, 2019, isipokuwa Siku ya Sherehe ya Mwili na Damu ya Bwana wetu Yesu Kristo hapo Juni 23, 2019.*** Siku hiyo, katika maadhimisho ya Misa ya Sherehe ya Mwili na Damu ya Bwana wetu Yesu Kristo, badala ya Misa ya Marehemu iadhimishwe tu nia ya kuwaombea marehemu hao. ***Na ifikapo Juni 25, 2019, mapadri wote na waamini wengi iwezekanavyo toka maparokiani kwa uwakilishi watahitimisha Novena ile kwa Misa ya Wafu katika Kanisa Kuu la Mt. Kilian, Uaskofuni Mbinga. Misa hiyo itaanza saa 4.00 asubuhi. Baada ya Misa kutakuwa na maandamano kuelekea kwenya kaburi la Mhashamu Baba Askofu Mstaafu Emmanuel Alex Mapunda, kwa ajili ya Ibada maalum.*** Misa na Ibada hiyo ndiyo itakayohitimisha kijimbo na rasmi maombolezo yetu.

3. Malezi ya Vyama vya Kitume Jimboni

Kwa kipindi kirefu sasa, vyama vyetu vya kitume kwa kiwango kikubwa vimekuwa vikijiendesha vyenyewe pasipo ujirani wa pekee wa walezi. Kwa mujibu wa ushauri na mapendekezo ya **mkutano wa Halmashauri ya Walei Jimbo, uliofanyika hapo Juni 11, 2019 Uaskofuni Mbinga**, tunapenda kutaarifu kuwakubali na kuwathibitisha wafuatao kuwa walezi wa vyama vya kitume Jimboni Mbinga:

3.1. Mlezi Kiongozi – Mhesh. P. Guido Ans. Turuka

3.2. Mlezi Msaidizi – Mhesh. P. Leander Ndimbo

Maadam utume wa vyama vya kitume upo chini ya Idara ya Utume wa Walei, pamoja na wajibu wao wa malezi wa vyama hivyo, walezi hao watawajibika kushiriki kikamilifu mikutano yote ya Idara ya Utume wa Walei na ile ya Halmashauri ya Walei Jimbo. Aidha kuthibitishwa kwa Walezi hao kulea vyama vya kitume Jimboni, hakutengui wala

kupunguza majukumu waliyokuwa nayo kabla. Tunawatakia utume mwema, na kwa upande wa wanachama wa vyama vya kitume, tunawaombeni muwape ushirikiano wenye tija katika wajibu wao kwenu.

4. Uchungaji wa Kimkakati

Ili kukabiliana na changamoto mbalimbali za maisha yetu ya imani na kiroho na zile za kichungaji katika Kanisa letu Katoliki, tunakumbushwa na kuhimizwa sana kutenda wajibu zetu za ufuasi kimkakati kwa kutumia Jumuiya Ndogondogo za Kikristo. Viongozi wetu wa Halmashauri ya Walei toka ngazi ya vigango hadi Jimbo, wanatakiwa kuhusika kikamilifu katika aina hiyo ya uchungaji wakitenda wajibu zao pamoja na mapadri na makatekista wao. Ni kwa njia ya utendaji wa wajibu wetu katika Jumuiya Ndogondogo, tunaweza kutunzani na kuhimizana katika maisha yetu ya imani na kiroho, na hivyo

kupunguza hatari ya wenzetu kurubuniwa kati yetu na waalimu au manabii wa uwongo.

5. Kutolewa kwa Daraja Takatifu ya Upadri

Tunamshukuru Mungu kwa Baraka ya miito mitakatifu hapa Jimboni, hususan wito wa Upadri. Siku za usoni, Mungu bariki, tunatarajia kufanya maadhimisho ya kutolewa kwa Sakramenti ya Daraja Takatifu ya Upadri kwa Mashemasi wetu wanne.

Kwa ajili ya kuhamasisha na kukoleza miito mitakatifu, maadhimisho hayo, Mungu bariki, yanatarajiwa kufanywa maparokiani kama ifuatavyo:

5.1. Shemasi Allen Mbele: Parokia ya Mbangamao, Julai 23, 2019

5.2. Shemasi Onesmo Hyera: Parokia ya Litembo, Julai 30, 2019

5.3. Shemasi Erasto Nyimbo: Parokia ya Ruanda, Agosti 01, 2019

5.4. Shemasi Sospeter Mahundi: Parokia ya Mango, Agosti 8, 2019

Waamini, hasa wa Parokia husika kipekee katika tukio hili kuu na takatifu, tunaombwa kuwasindikiza kwa sala, ikiwamo **Novena kwa Roho Mtakatifu kuelekea tarehe yenyewe ya kutolewa Daraja Takatifu ya Upadri kwa Shemasi**; lakini pia tunaalikwa kuhudhuria kwa wingi katika kila kituo kwa maadhimisho hayo.

Katika mwelekeo huo **Waheshimiwa Maparoko wote Jimboni** tunaelekezwa na **Mama Kanisa kufanya matangazo kabla ya kutolewa Daraja Takatifu, yanayohusiana na tukio hilo, kwa mujibu wa Sheria ya Kanisa, na. 1051 kifungu cha 2, kuanzia Juni 23, 2019 hadi Julai 14, 2019**. Mapato ya matangazo hayo yawasilishwe mara moja hapo **Julai 16, 2019, Ofisini kwa Askofu wa Jimbo**.

6. Maadhimisho ya Nadhiri na Jubilei

Mnamo **Julai 25, 2019**, Masista wetu wa Huruma wa **Mt. Vinsent wa Paulo, Mbinga**, watafanya **maadhimisho ya Nadhiri na ya Jubilei ya Miaka 25 ya maisha ya Wakfu kwa baadhi ya wanashirika wenzao**. Makleri na waamini wote Jimboni tunawaalika kuwaombea pindi masista hao wanapojiandaa kwa matukio hayo matakatifu; lakini pia tunaalikwa kujumuika nao katika **maadhimisho yenyewe ambayo yatafanyika katika Kanisa la Mt. Vinsent wa Paulo, Shirikani Mbinga**.

Aidha, hapo **Agosti 29, 2019**, katika **Kanisa Kuu la Mt. Kilian, Mbinga**, kutakuwa na maadhimisho ya **Jubilei ya Upadri; Mheshimiwa Padri Osmund Nchimbi miaka 50 na Mheshimiwa Padri Lukas Kanyambala Hyera miaka 25** ya huduma kama mapadri. Tunahimizwa sote kuungana nao kwa sala na moyo wa shukrani katika nafasi hiyo, lakini pia kuomba kwa ajili ya miito mitakatifu.

Pamoja na maadhimisho hayo, mnamo **Septemba 21, 2019, Mapadri Wamisionari Wavinsenti wataadhimisha Jubilei ya Miaka 25 ya Utume wao Tanzania.** Maadhimisho hayo yalizunduliwa **Septemba 22, 2018** kule **Bombambili, Jimbo Kuu la Songea** na kilele chake kitafanyika katika **Kanisa la Mt. Vinsenti wa Paulo, Utawani Mbinga.** Sisi wanajimbo wa Mbinga tunawiwa zaidi hasa kwa kuzingatia kuwa mlango wa utume wao hapa **Tanzania ni Parokia ya Mpepai.** Na kwa sababu hiyo hapo **Septemba 24, 2019** kutakuwa na maadhimisho ya **Jubilei ya Miaka 25 ya Parokia ya Mpepai.** Sote tunakaribishwa kuhuddhuria matukio hayo ya kihistoria katika Jimbo letu.

7. Ugeni Rasmi toka Jimbo Ndugu Wuerzburg

Mungu bariki tunatarajia kuupokea ugeni toka **Jimbo Ndugu Wuerzburg** ambao utaongozwa na **Mhashamu Baba Askofu Msaidizi Ulrich Boom.** Ugeni huo, ambao tutakuwa nao kuanzia **Julai 31 hadi Agosti 12, 2019,** uwapo hapo Jimboni,

pamoja na mengineyo utafanya pia kazi za kitume kama ifuatavyo:

7.1. Kuibariki na kuizindua Nyumba na Kituo cha Malezi cha Masista wa Mkombozi Litumbandyosi, 04.08.2019

7.2. Kubariki Kikanisa na kutoa Sakramenti ya Kipaimara Kigango cha Mtetema, Mpepo, 05.08.2019

7.3. Maadhimisho ya Sakramenti ya Kipaimara, Parokiani Makwai, 07.08.2019

7.4. Maadhimisho ya Sakramenti ya Daraja Takatifu, Parokiani Mango, 08.08.2019

Tunawaalika na kuwahamasisha waamini wote Jimboni kujiandaa kuupokea ugeni huo kwa moyo wa shukrani na ukarimu, na kwa namna ya pekee katika maeneo yale ambayo utapitia na zaidi sana kufanya utume maalum.

8. Kongamano la Utoto Mtakatifu Kijimbo 2019

Tunapenda kuwaarifuni kuwa, **Idara ya Kichungaji Jimbo**, mwaka huu imeandaa **Kongamano la Watoto wetu wa Utoto Mtakatifu**, ambalo linatarajiwa kufanyika katika viwanja vya **Parokia Teule ya Nkile, Udekano wa Lituhi**, kuanzia **Septemba 6, 2019 hadi Septemba 9, 2019. Udekano wa Lituhi** unaelekezwa kushirikiana na **Parokia Teule ya Nkile** katika kuratibu maandalizi ya kuwa wenyeji wa Kongamano hilo.

Aidha **Walezi** wote wa **Utoto Mtakatifu Jimboni** wanatakiwa kuwa makini katika kuandaa ushiriki mkamilifu wa watoto wetu wa **Utoto Mtakatifu** katika Kongamano hilo. Tunatoa mkazo huo hasa kwa kuzingatia ukweli kuwa kwa kushiriki kwao watoto wanaanza kuthamini ile zawadi ya imani waliyopewa kwa Sakramenti ya Ubatizo. Na wanapolijua hilo, wanajifunza pia namna ya kushirikiana na wenzao katika kuifurahia zawadi hiyo.

Kwa waamini wote, tukumbuke kuwa hiyo ni sehemu tu ya maandalizi ya maadhimisho ya **Mwezi Maalum wa Oktoba 2019**, tunapoadhimisha **Jubilei ya Miaka 100 ya Barua ya Kichungaji ya Papa Benedikto XV, “Maximum Illud”** yenye uvuvio mkubwa wa utume wa umisionari. Mwezi huo wa Oktoba kila mwaka na katika Kanisa Katoliki ulimwenguni kote ni mwezi wa umisioni ambapo tunao wajibu wa kusali kwa ajili ya kuiishi kipekee na ipasavyo roho ya Kimisionari. Tunaelekezwa kuwa kila aliyebatizwa katika Kristo na anatumwa kutenda kazi ya umisionari ya kuitangaza Injili ya Kristo. Na kwa sababu hiyo kaulimbiu ya maadhimisho ya Mwezi Maalumu wa Oktoba 2019, **“Umebatizwa na unatumwa kuitangaza Injili!”**, hupata uhalali wake.

9. Ari, Moyo, Ukarimu na Uwajibikaji katika Kutegemeza Kanisa

Tunakumbushwa kuwa, hapo **Novemba 17, 2019, Dominika ya 33 ya Mwaka**, kama ilivyoazimiwa hapo

mwaka jana, **ni siku yetu rasmi ya kutoa michango yetu kwa moyo wa shukrani na ukarimu kwa ajili ya kutegemeza Jimbo letu.** Katika siku hiyo, kila **Parokia** hali kadhalika kila **taasisi** hapa Jimboni, inakumbushwa kuwasilisha **michango yake elekezwa, lakini pia ile ya kutoka kwa wadhamini wake.** Michango hiyo, kwa ajili ya ufanisi wake inadai maandalizi ya kutosha, **ikiwamo uhamasishwaji na uelimishwaji.** Haitapendeza Parokia au taasisi kuwasilisha michango kwa namna ambayo inaakisi kuwa Parokia au taasisi husika haikuwa makini au ilifanyia mzaha zoezi zima la kutegemeza Kanisa mahalia. Roho hiyo ya uchangiaji ndiyo inayotoa picha, vidokezo au viashiria jinsi Familia ya Mungu toka katika ngazi ya jumua inavyoweza kusimama pasipo kutegemea uhisani wa nje. Kwa hiyo kila Parokia au taasisi, itumie mbinu zilizo halali na adilifu katika kuhamasisha, kuelimisha, kukusanya na kutunza au kuweka Benki michango hiyo kwenye akaunti husika kuelekea kuyafikia malengo yetu.

Hitimisho

Hatimaye, ndugu waheshimiwa na wapendwa Familia ya Mungu, tunawapa Baraka yetu ya kitume kwa upendo mkuu, na tunawatakieni kila la kheri na ufanisi katika utekelezaji wa yale tunayopaswa kuyatenda. Mwenyezi Mungu azisikie sala zetu za pamoja na atushushie kwa ujumbe wa Injili neema za Roho Mtakatifu katika wito wetu wa kuwa wafuasi wamisionari hodari wa Bwana wetu Yesu Kristo katika kuishirikisha imani tuliyozaawadiwa kwa wengine.

**Imetolewa Uaskofuni Mbinga, Juni 16, 2019,
Sherehe ya UTATU MTAKATIFU.**

John Chrysostom Ndimbo

ASKOFU WA MBINGA